



Inatsisartuni ilaasortaq Suka K. Frederiksen, Siumut.

## **Realkreditimut assingusunik taarsigassarsisarneq pillugu § 37 naapertorlugu apeqqutinut akissuteqaat**

Realkreditimut assingusunik taarsigassarsisarneq pillugu apeqqutinut nassiuinneqartunut qujanaq. Matuma kinguliani apeqqutit issuarneqarput, akissutinik malitseqartinneqarlutik tamanullu isummersuutinik naggaserneqarlutik.

### **1. Naalakkersuisut Realkreditimut assingusumik nunatsinnut sineriammi tamanit attartorfigineqarsinnaasumik (erniakitsunik) aqqtissiuiniarp? Piffissalersuisoqarnikuua?**

**AKISSUT:** Ineqarnermi pisortanit tapersiissutinik arlalinnik, innuttaasunit atorneqarsinnaasunik atuutsitsisoqareerpoq. 20/20/60-imut aaqqissuussineq pingoartumik illoqarfinni realkreditimut taarsigassarsiviusinnaasuni atorneqartarpooq, kisiannili aamma illunik piginitut iluarsaassinerinut erniaqanngitsunik akilersugassaanngitsunillu taarsigassarsisarnerannut atorneqartarluni. Sumiiffini allani sanaqataaffiusunik illuliornermut pisortanit tapiiffigineqarnissamut qinnuteqarnissamut periarfissaqartitsisoqarpoq. Pisortanit aaqqissuussinernik nutaanik allanik atuutsitsilernissamik Naalakkersuisut pilersaaruteqanngillat, kisiannili konto pingarneq 87.72.22 Nunaqarfinni isorliunerusunilu inissialiorternissamut pilersaarut aqqtigalugu aningaasanik amerlanerusunik immikkoortitsinissamut pilersaaruteqarput. Taamaalilluni innuttaasunit amerlanerusut sanaqataaffiusumik illulornissamut aaqqissuussinermik atuinissamut periarfissaqalissapput.

Realkreditimut taarsigassarsiat suliassaqarfimmut inatsisit naapertorlugit aammalu niuernikkut eqqarsaatersuutit tunngavigalugit realkreditimut taarsigassarsiniartarfinit namminersortunit taarsigassarsiaritinneqartarpooq, aammattaaq apeqqut 3-mut akissuteqaatiga takuuk.

Naalakkersuisooqatigiinnissamut isumaqatigiissut naapertorlugu Naalakkersuisut aningaasaateqarfimmik pilersitsisinnaanermut periarfissanik eqqarsaateqarput, kisiannili suli misissuinernik aallartitsisoqanngilaq aammalu tassunga aningaasanik immikkoortitsisoqanngilaq.

### **2. Sinerissami nammineq piumassutsiminnik inerisaaniartunut attartornissamut assigiinerusunik periarfissiisoqarniarp? Ass. illutaarniartut imaluunniit illuminnik annertuumik aserfallatsaaliuiniartut il.il.**

**AKISSUT:** Innuttaasut realkreditimut taarsigassarsiniarfiusinnaasut avataanni najugaqartut illuliorusuttut aningaaserivinnut taarsigassarsiniarnissamut imaluunniit annertuumik sipaagaqarnissamut innersunneqartariaqarput. Taakku saniatigut sanaqataaffiusunik illulornissamut qinnuteqarsinnaapput, tassanilu inoqutigiiit isertitaat malillugit nammineerluni aningaasaliinissaq piumasarneqarpoq. 20/20/60-imik aaqqissuussinerup aammalu BSU-mut aaqqissuussinerup iluanni iluarsaassinissamut taarsigassarsiniarnissaq maanna periarfissaalerpoq. Inatsit iluarsaaneeqareerpat aaqqissuussinerup annertusineqarnissaa Naalakkersuisut sulissutiginiarpaat. Tassani Inissialiornermut, illunut ataatsimoorussanut,

2. marts 2015  
Sagsnr. 2015-111429  
Dok. Nr. 1881511  
Postboks 909  
3900 Nuuk  
Tlf. (+299) 34 50 00  
Fax: (+299) 32 52 86  
E-mail: isan@nanoq.gl  
www.naalakkersuisut.gl

illuliassanut il.il. tapersiissuteqartarneq pillugu Inatsisartut peqqussutaat nr. 11, 19. november 2007-imeersoq aamma Illuliortiternernut aningaasalersuineq pillugu Inatsisartut peqqussutaat nr. 1, 7. maj 2007-imeersoq pineqarput.

### **3. Nunatsinni innuttaasunut attartornissamut periarfissat assigiinngissutaat annertuvoq, tamanna nalimmassarniarlugu qanoq iliuuseqartoqarniarpa?**

**AKISSUT:** Aningaasanik taarsigassarsitsisarneq niuerfiuvoq, folketingimit sukannersumik maleruagassiunneqartoq. Realkreditimut taarsigassarsiniartarfitt aningaaseriviillu taarsigassarsitsisarnernut atatillugu piumasaqaatinik sukannersunik malinnittussaapput. Ilaatigut taarsigassarsitsisup taarsigassarsiani sumiginnarpagit taarsigassarsiat akilerneqarsinnaanissaannut qulakkeerinissaq piumasarineqartarpooq. Tamanna pissutigalugu aningaaseriviit realkreditimullu taarsigassarsitsisarfitt illoqarfitt annerit avataanni taarsigassarsitsinissamut tunuarsiamaartarput. Tamanna assilianngorlugu imatut nassuiardeqarsinnaavoq, illu sananeqarnermini katillugit 1.500.000 koruuninik akeqassappat aammalu inoqutigiit 300.000 koruuninik sipaagaqarsimappata, taarsigassarsiassatut pisariaqartinneqartut 1.200.000 koruuniupput. Kisiannili paasinarsisinnaavoq, illup sumiiffimmia alajangersimasumi niuerutigineqarnermini nalinga 600.000 koruuniusoq. Taamaalilluni taanna taarsigassarsianut 1.200.000 koruuniusunut qularnaveeqqutigissallugu naammanngilaq.

Kisiannili inoqutigiit 1.200.000 koruuninik taarsigassarsinissaq angusimassagunikku, soorlu pisortaniit, aammalu illumit nuuttariaqalissagunik, illulu niuernermut akiusoq 600.000 koruuniusoq atorlugu tunisiaqalissagunikku, inoqutigiit illumit nuunnerminni 600.000 koruuninut sinneruttunut akiitsoqalissapput. Akiitsut taakku akilersorneqartussaammata, sumiiffimmia allami inuunermik nutaamik aallartitsinissaq ajornakusoortorujussuusussaavoq.

Ajoraluatumik ajornartorsiut taanna ilisimaneqarluarpooq, maani nunatsinniinnanngitsqoq, aammali sumiiffinni allani innuttaasut illoqarfinnit minnerusuniit illoqarfinnut annerusunut nuuttarneranni. Amerlanertigut sumiiffinni taamaattuni illut niuerutigineqarnerminni nalingat appariartortarpooq, sanaartornermullu aningaasartuutinut naapertuutaratik.

Taamaattumik pisortat sumiiffinni taamaattuni taarsersugassanik ernialersugassanillu taarsigassarsitsinissamut mianersortorujussuusariaqarput, tamatumani erniat qanoq appasitsiginerat apeqqutaatinnagu.

Aaqqissuussinermi maanna atuuttumi illunut sanaqataaffiusunut erniaqanngitsunik akilersugassaangitsunillu taarsigassarsitsisoqartarmat, illumik piginnittoq inissiamit nuussagaluarpat Namminersorlutik Oqartussat illumik utertitsinissamut pisussaaffeqarnerat sanaqataasumut qularnaveeqqutaasarpooq. Tamatumunga atatillugu taarsigassarsiat naatsorsorneqartarput – ukiunut 33-nut angeqqatigiinnik appartikkiartuaarneqartarlutik – aammalu illup teknikkikkut aningaasaqarnikkullu nalinga naliliiffigineqartarpooq. Taarsigassarsisup iluanaarutissai akilerneqartarput. Taamaalillunilu sanaqataasoq illumut pituttugaassanngilaq, kisiannili annertuumik akiitsoqarani sumiiffimmia allami inuunermik nutaamik aallartitsinissamut periarfissaqarluni.

Tassalu inissialortiternermut tapiissuteqartarnerup atuuttup iluani innuttaasut nutaanik taarsigassarsinissamut periarfissaqarnissaasa eqqarsaatigineqarnera ersarissumik assigiinngissutaavoq.

Naggasiutigalugu erseqqissaatigissavara, ineqarnermut akiliut qaffasippasikkaluartoq, taamaattumillu inissiaq nammineq pigisaq pilerinarpasikkaluartoq, inissiamut nammineq pigisamut aningaasartuutit ingerlaavartut aamma amerlasarput. Illumut taarsigassarsisoqarsimappat, taarsigassarsisup ullumut qularnaveeqqusiiimanissaq piumasaqaataavoq. Aamma illu qalipanneqartartussaavoq

iluarsaaneqartartussaallunilu. Pingaartumik assersuutigalugu kiassaammik uuliatortumik taarsiinissaq aningaasartutigissallugu akisusarpoq. Illumik nammineq piginnittuunissaq pilerinarsinnaagaluartoq, tamanna tamanut pitsaanerpajusariaqanngilaq, tassami ingerlaavartumik pilersaarusiortoqartartussaavoq missingersuusiorqartartussaallunilu. Aamma ukiuni arlalinni najugaqarnissap qulakkeernissaa pisariaqarpoq, illumik pisinermut atatillugu tamatigut aningaasartuuteqartoqartussaammat (naqissusiinermut akitsuutit, piginnittuunermut uppernarsaat il.il.). Taamaattumik inissiat assigiinngitsut arlallit pigineqarnissaat, taamaalillunilu attartortoqarnissaa piginnittooqarnissaalu eqqumaffigisussaavarput.

Taamatut oqaaseqarlunga neriuuppunga apeqqutitit tamakkiisumik akisimassallugit.

Inussiarnersumik inuulluaqqusillunga

Knud Kristiansen